

E tipo di actividad mas agradable cu tin "We Culture"

Siman pasa diasabra mi a dicidi di bay mira e presentacion di "We Culture" na San Nicolas. Tabata di 4 edicion di e actividad aki. Mi tabata na haltura cu tin e, pero no a sigui busca pa sa mas. Tabata dos dia prome, cu mi a bin haya sa cu ta un biaha pa luna y cu e siguiente lo ta e Diasabra venidero. Mi a dicidi cu mi lo bay.

Cu tur dolor di trafico (atardi pa) anochi pa sali di Playa yega San Nicolas, mi a mara tur 4 faha di seguridad di mi auto rond di mi curpa, pasando e rotondenan y core riba e caminda cu ta wordo yama "Trampolin corridor". Tabata un alivio ora mi a para auto panort di O'Neil's pa despues cococha cu 100 paso pa yega unda mi mester tabata. Net dilanti e obra di arte di e artista peruano, na muraya unda tabata mas o menos entrada di Acme Store den pasado, esta e parti pazuid di O'Neils.

Sigur no tabata tin mas di 30 persona presente pa "We Culture" pero sigur ta tambe cu cada un a pasa un anochi sumamente agrabel, placentero y divertido. Esaki ta e sorto di actividadnan pa mira nos "artistanan" hoben briya. Mayoria a cuminsa den actividadnan asina y crece bira grandi. Mi a sinta wak cielo y cambio di nubianan y reflexion di luz cu a duna e nubianan diferente tono di calor. Glenda Heiliger a bisami pa "stop di soña". Mi di cune, "bo sa cu 55 aña pasa, aki mi tabata organiza aki show di caya cu artistanan solista cu nan guitara, duo of trio? Na otro banda di caya, Helena Genser y mi persona tabata ricibi teenagernan for di Lago Heights pa Brazil riba diasabra anochi pa cana bay Rincon, cana bay Fontein, cana bay te cerca di Daimari y un biaha yega Urataka?" Ta e recuerdonan aki a bin dilanti awor ey."



Pa toca y canta riba caya no tabata tin microfon ni equipo di sonido. Pero e anochi aki cu un "generator" na otro banda di caya, tras di tur e bishitantenan, tabata tin suficiente coriente pa luznan di camera di video, di microphone usa pa e participante, pa computer y equipo di sonido. **Sonny Richardson (Rootsman)** pa di 4 siman riba su mes cu algun ayudante a logra exito cu su actividad.

E MC, Maestro di Ceremonia tabata **Leonardo Philips** y mi tin cu bisa cu den e 60 aña cu mi ta haci trabao di MC pa actividadnan, mi a mira hopi bon, hopi mihor, y hopi cu a sobresali. E hoben aki ta un cu a sobresali y sa con pa wanta interes di su audiencia. Pa "We Culture" mi lo no por a para na pia di **Leonardo** den presentacion. Ainda mi no a menciona con su presentacion di poesia tabata,



habriendo e anochi cu varios poema prome cu el a presenta "Catherine Kamara" cu mi a conoce cantando como mucha den concurso di calypso y roadmarch infantil y hubenil. E tabata **Catherine de Graaf** y si mi no ta kiboca su nomber artistico como mucha tabata "Flashing Luz".

El a crece, bay Hulanda, bay Merca, studia, desaroya su mes y a bolbe Aruba como un artista admira y cantante cu voz formidable. Mi a mira un cantante "Catherine Kamara" completo cu ta intercambia netchi cu su publico y cu a gana curazon di tur hende. No por keda sin menciona cu el a "ranca lagrima di mi wowonan" pero no ami so. Mi a tende di varios hende cu a basha lagrima na momento cu el a canta "Black Queen".



"Black Queen, bo ta un ser humano fuerte; Black Queen, bo no ta bo so; Black Queen tene bo cabez na laira bo por mishi cu cielo y Black Queen no entrega, no bandona bo lucha." Drentando su perodo di "teenager" el a skirbi e cantica aki dedica na su mama cu a cria 2 yiu su so. E anochi aki e mama tabata orguyoso sacando video di presentacion di su yiu muher.

Reginald de Palm, "Quake" a declama dos obra di un di su 2 bukinan di poesia, y tambe a lesa un fragmento di e buki "Rendezvous" cu el a presenta e anochi aki. Su dos poesianan tabata asina bunita cu lo mi skirbi tocante asakinan despues cu mi caba di lesa "Rendezvous" cu mi a dicidi di cumpra mes ora, despues cu el a splica con el a yega na e 11 storianan cortico den e buki. Pero e mester a trece e buki na trabao diamars, pasobra e anochi ey ta "capi" y no placa, mi tabata tin, y sigur tabata cu e "generator" di "Rootsman" no ta funciona cu carchi di ATM.

Un figura masha popular di kende mi a tende hopi hoben papia ta "Beach". Mi a mira su performance e anochi aki y con el a briya como poeta, y escritor den su monologo (artistico). Como actor, e monologo cu el a tene pa e publico sigur den **Cas di Cultura**, lo a cautiva e audiencia si tabata eynan. Ki talento e hoben aki tin. Asina cu el a presenta pia abao y cuminsa move cu microfono den man, mi tabata sa cu ta algo special mi lo mira. Esey mi a haya tambe. Diadomingo el a haci mescos na **Playa na Flor de Oriente** durante e actividad entretenimento cu tabata tin di atardi te anochi, segun informacion cu mi a busca pa haya sa, pasobra mi a traha y no por a atende esaki. "Beach Delamare", "Beach Lama", "Beach" danki pa momentonan di gozo di bo presentacion! Loke mi a tende tabata berdad: "Ora Beach papia, tur hende ta scucha!"

E anochi a cera cu musica di **Sonfaya 2020 & Friends** sigui pa e publico chikito keda hunto conversando di e dushi ora y mey cu nan a pasa sperando caba riba e proximo. Mi ta recomenda tur hende pa presencia e siguiente anochi di "We Culture". Mi mes lo recorda tur hende di esaki, asina cu **Sonny Richardson** y su grupo dicidi riba fecha. E fotonan ta muestra **Sonny** ta conversa cu e cantante **Catherine Kamara** y tambe unda **Sonny** ta conversa cu mi persona, y por mira **Beach** durante su presentacion, ademas e presentacion di buki y di poema di **Reginald de Palm (Quake)**.

Juby Naar

